

Ministernan no por pasa suma aproba mes facil mas

Awo cu CAFT lo tin mas control riba presupuesto 2016

ORANJESTAD - Cu e ley nobo di CAFT awo e control pa trata presupuesto 2016 lo ta uno diferente compara cu e otro presupuestonan cu a keda trata den pasado pa cual aki presidente di parlamento Marisol Lopez - Tromp a splica mas di kico ta e cambio y e control cu lo tin awo.

“Ta entrega e concepto di presupuesto 2016 riba liñanan grandi compaña cu datonan, cifranan, puntonan cardinal di maneho di e diferente ministerionan. Y por bisa cu aworaki e documento aki ta bay pa conseho na CAFT despues di esaki lo haya conseho riba dje den dentro di mas o menos 2 siman di tempo.”

Cu e conseho aki, e lo wak si tin cosnan cu lo mester wordo adapta den e presupuesto. Esaki ta transparente pues e lo bin pa parlamento tambe wak, segun Sra. Lopez-Tromp. Despues di esaki e ley lo bay conseho consultativo y e conseho despues lo bay parlamento bek. E meta ta pa e ley wordo trata prome

cu fin di aña y pa por habri un aña 2016 cu un presupuesto aproba den e aña anterior manera mester ta.

Mas control y mas transparencia

Manera cu e ley keda aproba pa CAFT, ta asina cu tin proceduranan cu ta wordo haci unda cu CAFT lo duna conseho na gobierno, Sra. Lopez - Tromp ta splica. Den ley ta hancra kico e proceduranan aki ta, y e ta nifica cu na diferente momento durante di e proceso di e presupuesto ta bay tin momentonan di control. “E no ta bay ta manera antes mas cu ta aproba un presupuesto na inicio di aña y te fin di aña ta bay wak bek kico gobierno por a gasta of si nan a surpasa esaki entre otro. Y si nan a pase ban aproba e suma extra.” Segun e presidente di parlamento esaki ta pa pasado. Cu e ley di CAFT e tin su pro y contra, pero un esencia ta, cu ta bay tin un control mucho mas y na diferente momento riba e procedura y e ta bay ta mas transparente tambe pa parlamento por controla.

“Pues asina cu e ley wordo



aproba e no ta asina cu ta te na fin di 2016 ta bay wak locual cu e ministernan a haci, es mas si acaso si mester gasta algo adicional nan lo mester busca esey den nan mesun presupuesto. Nan no por surpasa esaki sin mas manera antes pues no ta bay tin gastamento bay gol manera hopi hende ta zundra cu tin.” Sra. Lopez - Tromp a bisa di ta bay wak tambe unda cada depchi ta bay cual nan ta hiba e procedura pa controla gobierno na un otro nivel.

Beneficioso

Pero awor e presupuesto lo bay pa CAFT y Consejo Consultativo pa cual aki a puntra Lopez-Tromp mirando cu tin dos control, no por

trece un bruhamiento si uno kier kita of pone den algo den e presupuesto.

El a splica: “Manera cu e ta hancra den e ley, Consejo consultativo semper ta haci su trabou di duna conseho na parlamento tambe y ta keda e ora na parlamento pa tuma e consehonan ey pa modifica un ley of ta acepta esey manera cu e ta.

E esencia ta si cu ta bay controla mucho mas estricto y mas frecuente si gobierno ta cumpli cu e palabracionnan cu e mes a haci,” e normanan cu e mes a stipula y esey por ta solamente beneficioso, segun Sra. Lopez-Tromp.

A puntra Sra. Lopez Tromp kico ta pasa si conseho con-

sultativo bisa cu mester kita tanto y CAFT bisa otro

“No ta bay porta riba kico tin cu kita. E ta controla si bo ta cumpli cu bo mesun maneho. Esey tambe ta un tarea cu parlamento tin. No ta bay solamente pa placa, e ta si loke bo a bisa bo ta bay haci y si bo ta cumpli cun’e tambe asina. Mi por bisa cu pa parlamento despues cu e ley di supervision financiero a pasa, ta importante cu ta haya tur informacion na ora, tur informacion cu nos por haci e trabou mas debido.” Parlamento no ta unico responsabel, parlamento ta ultimo stacion cu ta haya e ley, prome cu esey tin cantidad di departamento cu ta pasa den e ley principalmente presupuesto. Departamento di financia, departamento huridico, tin diferente departamento cu nan listanan di deseo, tin conseho di minister, tin un cantidad di puntonan di control. “Al final e producto ta yega parlamento y no ta solamente nos ta responsabel. Mucho mas actor ta responsabel y parlamento su trabou ta pa controla si e ta cuadra den e palabracionnan haci, Sra. Lopez-Tromp a termina bisando. □